


# Kuwa na Imani



## SABATO MCHANA

**Somo la Juma Hili:** Marko 8:11,12; Mt. 15:21-28; Lk. 7:1-10; Efe. 2:8; Ebr. 11; Ufu. 14:12.

**Fungu la Kukariri:** “Basi imani ni kuwa na hakika ya mambo yatarajiwayo, ni bayana ya mambo yasiyoonekana” (Ebr 11:1).

Mtu fulani aliwahi kusema, “Imani ni kama WiFi, haionekani lakini ina uwezo wa kukuunganisha na kile unachohitaji.” Hakuna shaka kwamba pasipo imani, kusingekuwa na uhusiano na Mungu.

Imani yako ikoje leo? Je, imani yako kwa Mungu imewahi kuyumbayumba? Huenda umepata uzoefu wa kitu ambacho kimekupa changamoto kiasi cha kushindwa kuelewa jinsi ya kusonga mbele katika uhusiano wako na Mungu. Au imani yak oni kama ua la waridi ambalo linachipuka kutoka katika shina la kijani na kuwa chipukizi jembamba ambalo mara huchanua na kuwa ua lenye rangi nzuri na kukijaza chumba kwa harufu nzuri isiyoweza kusahaulika? Kwa hakika, “imani huonesha uhalisia wa kile tunachokitarajia; ni bayana ya mambo tusiyoeweza kuyaona” (Ebr. 11:1 tafsiri ya kutoka NLT). Si kitu ambacho tunaweza kukitengeneza sisi wenyewe, kwa maana “Mungu alivyomgawia kila mtu kiasi cha imani” (Rum. 12:3). Imani ni karama ya Mungu (Efe. 2:8,9), na hata hapo, imani yetu kwa Mungu inawezekana kwa sababu tu ya kile ambacho Mungu tayari anafanya ndani yetu na kwa ajili yetu.

Juma hili hebu tuchungue mada ya imani: cha kufanya na mashaka na kutokuamini; kile ambacho, kwa mujibu v'a Yesu, imani imara inafanana nacho; na maana ya kuwa na “imani ya Yesu.”

*\*Jifunze somo la juma hili ili kujiandaa kwa ajili ya Sabato, Mei 23.*

## Nipe tu Ishara

Huenda umewahi kusikia watu wakisema, “Kama tu ningeweza kuona bahari ya Shamu ikigawanyika, au mana ardhini, au Yesu akimponya kipofu, ningeamini.” Au bila shaka wewe mwenyewe umewahi kuwa na fikra za jinsi hiyo.

Kwa nini iwe rahisi kwetu sasa kuwa na imani kuliko ilivyokuwa kwa wale wa zama za kale za Biblia? Waisraeli hawakuwa na Biblia nzima, wala hawakuwa na historia ndefu ya kurejelea kama ilivyo kwetu. Musa alihimiza juu ya umuhimu wa kurejelea historia ili kukumbuka uongozi na wema wa Mungu (*taz. Kum. 4:7-10; Kum. 8:2,3*). Tofauti na Waisraeli, tuna miaka 6,000 ya historia ya Biblia ya kurejelea (*taz. Yohana 20:30, 31*).

Kila kizazi kinataka ishara, na cha kwetu hakina tofauti. Lakini ishara zimetuzunguka pande zote. Ikiwa utasoma Mathayo 24, utaona ni vitu vingi kiasi gani vimetimia na vinatimia hata sasa. **Watu** hata wakati wa Yesu walitaka ishara ya kuwa Yesu alikuwa Mwana wa Mungu hasa, hata kama tayari walikuwa wameona ishara nyingi. Yesu aliwajibuje? (*taz. Marko 8:11,12*).

Je, tunabishana na Yesu na kumjaribu kama walivyofanya Mafarisayo? Je, tunamfanya “augue sana rohoni mwake” (*Marko 8:12*) kwa sababu ya kukosa imani kwetu wakati ambapo tayari ametupatia vyote tunavyohitaji ili kuamini? “Lakini ishara hizi hazikuwa hasa walichohitaji. Hakuna ushahidi wowote wa nje ambao ungewafaa. Walichohitaji hakikuwa kuangaziwa kiakili, bali matengenezo ya kiroho.” – Ellen G. White, *Tumaini la Vizazi Vyote*-Sehemu ya pili, uk. 12. Je, yumkini sisi pia tunahitaji matengenezo ya kiroho, matembezi ya dhati, halisi na ya daima pamoja na Mungu? Bila shaka, kiukweli hatuhitaji ishara, kwa sababu tunao utitiri wa maarifa mikononi mwetu, hasa kutoka katika Biblia.

Hivyo, badala ya kumfanya Yesu “[augue] sana” kwa sababu ya kukosa imani kwetu, hebu tukumbuke maneno ambayo Yesu alisema kwa Thamaso: “wa heri wale wasioona, wakasadiki” (*Yn. 20:29; taz. pia Ebr. 11:1*). Mungu hatuombi kuwa na imani isiyoona – tayari Ametupatia utitiri wa sababu za kuamini. Na bado pamoja na wingi huu wote wa sababu, daima kuna fursa ya kuona shaka. Cha msingi ni kulenga katika kila kinachoithibitisha imani na wala si kwa kile kiletacho mashaka.

Kwa sekunde 60 tu, unaelezeaje imani yako kwa Mungu? Je, jibu lako linakueleza nini juu ya kutembea kwako na Mungu?



## Yesu Anaiona Imani Yetu

**Linganisha** jinsi Yesu alivyoielezea imani ya wanafunzi Wake katika Marko 4:40 na imani ya mwanamke katika Mathayo 15: 21-28.

Kwa vile tu tunajiita wafuasi wa Yesu haimanishi kuwa hiyo inaifanya imani yetu kuwa imara. Kwa kweli, kuna watu walidai kuamini, lakini Yesu alitambua kile halisi kilichokuwa myoyoni mwao (*Yohana 2:23-25*).

**Soma** Luka 7:1-10. Tunajifunza nini juu ya imani kutokana na maelezo haya?

Katika Marko 9 tunasoma habari za mtu aliyekuja kwa Yesu ili kwamba Yesu amtoa mwanawe pepo, lakini aliyeweza tu kuitia ujasiri wa kutosha imani yake na kusema “Naamini, nisaidie kutokuamini kwangu!” (*Mk. 9:24*).

Katika kila moja ya mazungumzo haya, Yesu aliona imani ya watu, au kupungua kwake, na kufanya miujiza kama matokeo ya imani hiyo au kwa ajili ya kuiimarisha.

Ingawa Roho Mtakatifu hutuhimiza kuamini, adui wa roho anatutaka tuwe na mashaka na kuondolea mbali uhusika wa Mungu katika maisha yetu. “Hali ya kutokuamini inayooneshwa ndani ya roho ina nguvu ya ushawishi. Mbegu za mashaka ambazo wamekuwa wakizipanda zitaleta mazao yake lakini imewapasa kuendelea kung’oa kila mzizi wa kutokuamini. Wakati mimea hii yenye sumu inapong’olewa, inakoma kukua kwa uhitaji wa virutubishi kwa maneno na matendo. Roho inapaswa kuwa na mimea ya thamani ya imani na upendo iliyopandwa katika udongo wa moyo na kutawazwa hapo.” —Ellen G. White, *Faith and Works*, uk. 17.

Tunapokuwa na mashaka juu ya Mungu, tabia Yake au Neno Lake, tufanyeje? Mungu hapuuza au kui epuka mantiki ya mwanadamu, kwa kuwa alitumbua kwa sura yake, na anatualika kuzungumza Naye, kama alivyofanya na Ibrahimu, Musa na Ayubu. Mungu anatualika kujifunza kufanya kazi ndani ya mifumo yake mikubwa isiyo na kikomo ya busara, hata kama mahali fulani inatupasa kujisalimisha kwa kile tusichokielewa kikamilifu.

Fikiria juu ya sababu zote za kimantiki ulizo nazo kwa ajili ya imani. Na wakati huo huo, ni wakati gani mantiki inakoma na imani iliyo thabiti inayoeleweka, inahitajika kutumika?

## Imani si Hisia

Yesu alisema kwamba ikiwa una imani ndogo kama punje ya haradali, utaihamisha milima (Mt. 17:20). Kama umewahi kuiona punje ya haradali, unajua jinsi ilivyo ndogo sana. Lakini, kuwa na imani ndogo kiasi hicho kunaweza kuleta mabadiliko makubwa. Kwa hiyo, lazima imani ni ya muhimu sana na pia lazima ina nguvu kubwa na thabiti kiasi cha kufanya kitu asichoweza kufanya binadamu. Hata hivyo, kama ambavyo punji ya haradali inaweza kukua na kuwa mti mkubwa (Mt. 13:31, 32), imani yetu inapaswa kukua na wala si kudumaa.

Kwa kweli, kwanza kabisa, tunahitaji kiasi fulani cha imani ili kuweza kuwa na uhusiano na Mungu.

**Je,** Waefeso 2:8 inatuambia nini juu ya nafasi ya imani katika kuokolewa? Kwa nini mtu asiwe na haki kusema, "sina imani kwa vile Mungu hajanipa kiasi chochote"?

Kwanza imetupasa kuelewa kuwa imani sio kitu yakinifu; ni mwitiko wa mwanadamu kutokana na kushawishiwa na Roho Mtakatifu. Mungu ni mwanzilishi mwema, ambaye kupitia kwa Roho Mtakatifu, anatumia Kwake tunapomruhusu kufanya hivyo (Yer. 31:3). Tunaokolewa kwa neema, kwa njia ya imani, ambayo ni mwitiko kwa neema ya Mungu tuliyopewa kupitia kwa kifo cha Yesu. Tunaokolewa kwa sababu tunamwamini Mungu kama matokeo ya neema Yake. Hiki ndicho kiini cha kuwa na uhusiano Naye.

Pili, imetupasa kukumbuka kuwa imani si hisia. "wengi hawaitumii imani ile ambayo ni haki na wajibu wao kutumia, mara nyingi walingojea hisia ile ambayo imani peke yake inaweza kuileta. Hisia si imani; haya mawili ni tofauti. Imani ni kwa ajili yetu kutumia, lakini hisia za furaha na baraka ni za Mungu kutoa." - Ellen G. White. Maandiko ya Awali, uk. 106.

Watu wengine wanaweza kujisikia kana kwamba hawana imani kwa vile hawajihisi kuwa karibu na Mungu au hawako kama walivyopaswa kuwa kama Wakristo. Lakini imani inahusu kumwamini na kumtumaini Mungu, sio tu katika nyakati njema bali katika giza, au katika dhoruba au hata wakati ambapo huwezi kuelewa kikamilifu kinachofanyika hasa katika maisha yako.

Hisia haipaswi kutawala uzoefu wetu wa kidini au uhusiano wetu na Mungu. Ni hasa wakati tunapodhani tuko mbali na Mungu ndipo tunapohitaji kutumia imani na kumwita (kama alivyofanya yule baba katika Marko 9:24).

**Hebu ziangalie aya hizi za Biblia na kuzidai kama kitendo cha imani kuimarisha uhusiano wako na Mungu leo: Ebr. 12:1, 2; 2 Nya. 15:7; Rum. 3:23-26; Luka 7:50. Zitamke kwa sauti wakati wa ombi lako kwa Mungu.**



## Mifano ya Imani

**Tumia** muda leo kujifunza Waebrania 11, sura ya imani kuu. Isoma kwa sauti kwanza bila kukoma. Kisha soma mara ya pili, na uandike mawazo yako kutokana na maswali haya:

- Soma tena aya ya kwanza. Ni kitu gani unakitarajia leo ambacho bado huwezi kukiona? (Fikiria juu ya mahitaji ya haraka na njozi za muda mrefu.)
- Je, imani ina sehemu gani katika ushuhuda wako binafsi na katika uongofu wako?
- Soma aya ya 3 tena, juu ya Mungu na uumbaji. Kwa nini, kwa namna nyingi, kuwepo kwa Mungu Muumbaji kiwe kitu rahisi kukubali kwa imani?
- Soma aya ya 6 na uandike ujumbe wa aya hii kwa maneno yako mwenyewe.
- Aya za 7- 40 zinafunua maisha ya wahusika mbalimbali wa Kibiblia. Kwa nini imani ni kipengele kikuu ambacho kinafasili uimara wa uhusiano wa watu hawa na Mungu?

Kumjua Mungu na kuwa na uhusiano hai na imara Naye kunahitaji imani. Unawezaje kuimarisha imani yako au kumtia shime mtu ambaye imani yake inayumba? Hapa kuna mawazo machache:

Imani ndogo kabisa (kama punje ya haradali) ina nguvu na ndiyo unayohitaji ili kujenga uhusiano na Mungu (Mt. 17:20). Ili mradi uko tayari kufanya kazi Naye, Mungu atasaidia imani yako kukua.

Imani huja kwa kumsikia Mungu akizungumza nasi katika Neno Lake, Biblia (Rum. 10:17). Azimia kujifunza Biblia na kuomba kila siku.

Mwombe Mungu akuongezee imani (Luka 17:5). Kama alivyofanya yule baba aliyekuja kwa Yesu akiwa na mtoto aliyepagawa na pepo na ambaye “alipaza sauti, akasema ‘Naamini, nisaide kutokuamini kwangu’” (Marko 9:24) tunaweza kutambua kutokuamini kwetu na kumwomba Mungu atuongezee imani yetu.

Imani na mashaka vinaweza kukaa pamoja (Marko 9:24). Usimwache Mungu kwa vile tu una maswali. Kwa kweli, ni muhimu kushughulikia wokovu wako kwa kicho na kutetemeka (Wafilipi 2:12-16) na “kumiliki” imani yako kuliko kuazima kutoka kwa mwingine kama wale wanawali watano walivyojaribu kufanya (Mt. 25:8).

Mwitikie Roho Mtakatifu na uombe ujazo wake zaidi katika maisha yako.

Tumia imani yako. Kumbuka kuwa imani sio hisia bali uamuzi wa kuamini. Kumbuka kuwa hata gizani, wakati usipoweza kumwona, Mungu yupo (2 Kor. 5:7).

Kama ombi binafsi la shukrani kwa Mungu kwa uaminifu Wake, angalia maneno ya wimbo “Kweli U Mwaminifu.” (KK. 30)

## Imani ya Yesu

Kadiri ulimwengu huu unavyokaribia mwisho wake, sehemu ya ujumbe wa malaika watatu inaelezea watu wa Mungu kuwa wanashika amri za Mungu na wana imani ya Yesu.

**Soma** Ufunuo 14:12. Je, imani ya Yesu inamaanisha nini?

---

Kama ukijifunza jinsi ambavyo Waadventista wa Sabato wameelewa kuhesabiwa haki kwa imani, utaona kwamba katika miaka ya 1890, uelewa wa imani ya Yesu na ujumbe wa malaika watatu vilihimizwa sana kanisani. Hadi kufikia wakati huo, kanisa lilikuwa limeweka mkazo mkubwa katika sheria na kulihitajika mkazo zaidi wa injili. Ellen G. White inaeleza vyema kwa kifupi: “Amri za Mungu zimetangazwa lakini imani ya Yesu haijatangazwa na Waadventista wa Sabato kama yenye umuhimu sawa, sheria na injili vikienda bega kwa bega.” *Selected Messages*, book 3, uk. 172.

Ingawa Waebrania 11 inaorodhesha wanaume na wanawake waliokuwa hodari wa imani, hakuna ambaye amewahi kuwa na imani inayoweza kulinganishwa na ile ya Yesu.

**Soma** Mathayo 26:36-42. Je, hii inatuambia nini kuhusiana na imani ya Yesu katika wakati huu muhimu sana?

---

Tunapokuwa na imani ya Yesu, hii inamaanisha kuwa si kwamba tu kwa utii Kwake na kwa Neno Lake tutaiga imani aliyokuwa nayo kwa Mungu, lakini pia kwamba tutakuwa na uzoefu hai wa kila siku wa kuishi na Yesu. Ni kujua na kutenda katika msingi wa kwamba bila kumfanya Yesu kiini cha maisha yetu ya kila siku, hatuwezi kuwa na uhusiano unaooko na Mungu.

Kuwa na imani ya Yesu kunamaanisha kumruhusu Yesu kukaa ndani yetu, na hivyo kuwa na imani Yake ndani ya mioyo yetu, kwa maana Yesu ndiye msingi wa kweli wa imani yetu. Nyakati zingine imani yetu yaweza kuwa dhaifu na nyonge. Lakini Yesu anastahili (*Ufu. 5:9*), na imani yake inaweza kudhihirishwa katika uzoefu wetu wenyewe, na kuhesabiwa kwetu, kwa karama Yake ya neema kwa wote waaminio.

Ni kwa kiasi gani unahitaji imani ya Yesu? Kwa unyenyekevu mwombe Yesu akupatie na dai Waebrania 11:6 kama ombi lako binafsi, ukisema “Bwana, pasipo imani haiwezekani kukupendeza. Naja kwako na kuamini kwamba Wewe Upo, na kwamba utanipa thawabu nikikutafuta kwa bidii. Nafanya hivyo sasa.”



**Jifunze Zaidi:** Tunahesabiwa haki (kusamehewa na kusawazishwa mahusiano yetu na Mungu) kwa imani (*Rum. 5:1*). Baada ya hapo pia tunatakaswa (kupewa uwezo wa kuwa kama Yesu) kwa imani (*Mdo. 26:18*). Tunapomkaribisha Yesu maishani mwetu pia tunakuwa watoto wa Mungu kwa imani (*Yn. 1:12*). Tunaishi kwa imani katika Mwana wa Mungu (*Gal. 2:20*).

“Hakuna kinachoonekana kuwa dhaifu zaidi, lakini kwa kweli kisichoshindika, kuliko roho inayojiona kutokufaa kabisa na kutegemea kikamilifu katika ustahili wa Mwokozi. Kwa maombi, kwa kujifunza Neno Lake, kwa imani katika kuwepo Kwake kwa daima, udhaifu wa wanadamu unaweza kushikamana na Kristo aliye hai, Naye atawashika kwa mkono ambao kamwe hautawaachilia.” Ellen G. White, *The Ministry of Healing*, uk. 182.

“Imani yao inapaswa iimarishwe kwa maombi ya bidii na kufunga, na unyenyekevu wa moyo. Ni lazima waondokane na ubinafsi kabisa, na kujazwa na Roho na uweza wa Mungu. Maombi ya dhati yenye kuvumilia kwa Mungu kwa Imani-imani inayoongoza katika kumtegemea Mungu kabisa, na kujitoa kikamilifu katika kazi yake- peke yake ndiyo yanaweza kumletea mtu msaada wa Roho Mtakatifu katika mapambano dhidi ya falme na mamlaka, juu ya wakuu wa giza hili, juu ya majeshi ya pepo wabaya katika ulimwengu wa roho.” —Ellen G. White, *Tumaini la Vizazi Vyote*, Sehemu ya pili, uk.39.

## Maswali ya Kujadili:

- ① Ni hoja gani tano zimeangaziwa katika dondoo ya mwisho hapo juu kuhusiana na suala la kushirikiana na Roho Mtakatifu dhidi ya adui?
- ② Je, imani ina sehemu gani katika vita dhidi ya uovu?
- ③ Unaonaje vita kwa sasa katika maisha yako mwenyewe?
- ④ Soma Waebrania 10:23. Kwa nini ni muhimu kushika sana ungamo la imani yetu?
- ⑤ Ni mara ngapi unauzingatia ukweli huu kwamba unapojisikia dhaifu zaidi, ni fursa kwako kumtegemea Kristo kikamilifu zaidi?

**Muhtasari:** Mungu humpatia kila mtu kipimo cha imani kama msingi wa uhusiano Naye. Kama Mwanzilishi na Mkamilishaji wa imani yetu, Yesu ni kielelezo cha nguvu ya imani kwetu sote. Imani yetu inapokuwa ndogo, tunapokuja kwa maombi na maombolezo tukiwa na moyo uliojalisalimishwa, Mungu atatenda miujiza katika maisha yetu (*taz. Yer. 31:2-4, 9, 11, 12*). Atatuongoza katika njia Zake zilizonyoka ili tusijikwae tena, nasi tutakuwa na amani. Yesu ndiye kielelezo kikamilifu katika mambo yote, na kuwa na imani Yake utatuhusianisha na watu Wake katika nyakati za mwisho.